



BEEN GIEX KUANG KAING CUB CAW BUN DAI MEUNG VAX.

**Lox tax Cub caw pa khriex khrawm bang kum
pui tang to Bun daing Meung Vax bawg Ra**

2014 num, khix tix (6) ngaix.

DEE SAWG NUM: KAING

1. Been khrawm grawh grawng khawm uik.
2. Baux 1 beeh glawm:.
3. Baux 2. Kaing yuh cub caw koe.
4. Baux 3. Cub cao kaing: daux bun meung vax.
5. Baux 4. Cub caw dee mawx dee an.
6. Baux 5. Num: riah cub caw an khan kix.
7. Baux 6. Beeh glawm cao kaing: khan kix.
8. Baux 7 . Pa cai: mai: mau khri.
9. Baux 8. Tang ceu.

PA KHRAWM BEEN GIEX KUANG.

Phan mawh cub caw bun daux meung vax kie nie, mawh son sang pon bun khan kix, pa ot daux meung vax, khawm uik tix luat luan, mawh cub caw son sang sawn: laig daux been prawng ca heue. Son sang sidiex gau pati mai: Asoyax ka bun, ki mawh sipauk pa daw son kaing in heue.

Can bun ku ceu pa ot daux Meung Vax, kix nie khaing simextix plak haoh heue. Bawg yam pa hoik luan ang ah, yam in ang ah, bawg yam pa sang hoek ang ah, son kaing ku plak ku vang, son sum:, son kaw: ka haktiex vax, dee pau riien ka krax kaux cong Meung Vax, kix mawh riang rao pa kaux cong ting lhaong son kaing in heue. Nie mawh ka daux kaing sum: ma kaung:, kix mawh pa nie lheu koe buan son: heue. Sum: cub caw bun koe yuh nin, mawh son sang haok huan krax ot grawng koe kawn pui heue. Mawh son sang tang pon bun daux pui ku ceu a khuang tang pon-yuh mawh tix cao tix heue. Been daux krax grawh grawng pati rob rom Meung Vax, been pa thong pa bung: Meung Vax, viex rhawm pa laoh pa riien: yuh kaux yuh to: lih awx. Yuh tix mawh pa yuh kaing koe buan son: son ceu bun daux ceu pui ku ceu heue. Mawh kaing joh jhaung: son sang si du simex sibun mai: paox tix heue. Sawg tix chuh ka bun, yuh krax kha bun, tawk griem bun awm pa ang lai mawh kawn pui, iak ngai: jhak ka bun, preet tix tik can ceu jhawm prim in khan kix awx.

LAWG (1)

Baux 1. Can cub bun daux pui ku ceu, kaing khraix khrawm mai sidiex gau, kaing yuh ma kaung:, kaing plak magmi, kaing ping nyia ngai: leg lai, kaing plak brax kua, kaing sum: pang ka kru naing, caw tix viex rhawm laoh rhawm rien: tix joh jhaung ka awx. Son sang kub sawm nyawm ot caw tix joh jhan ka heue. Tawx riang tawx rao son sang pon thai loh ka pa dah dha MeungVaxku plak ku ceu heue.

BAUX 2. Kieh bun khan kix koe rhawm tang giex klien min: sare cao tix, kieh koe pa tang muih to kaux cao tix, kieh koe rhawm pa tang yum rhawm ka cao tix, tang kaux rhawm ka cao tix, een rhawm ka cao tix, caw tix jhi, krai lao kix mhong yuh nan heue. Krax lhak, krax haing, krax pa chix leg lai ping nyia paw kieh dud sinax, sau riang mai joh jhan ka awx, son sang lih bun pa lheu lhak lheu chix caw tix eei: liang ka heue.

Baux 3. Yuh tang: bun kaing hak tiex dah dee ot, mai: kaing jhaw krax ot kawn pui, yuh daux been pa sidu awm paox tix,(Dimokresi) giex kuang jhak kia: daux been sidu awm paox tix awx. Phan mawh been giex kuang jhak kia ka bun mai: kawn iak, phan mawh son kaing an khan kix, kum: tau, ah tau, ceu kaing in khan kix ka laig daux heue.Kia ngiien, bre riien ka a khuang pa caw bun mai: kawn iak tix pon ka awx.

Baux 4. Phan rug caw tix mawh kaing son bun mai: kawn iak bre tix yuh ka awx. Kaing jhaw krax ot grawng koe kawn pui ku glawk mai krax kaing pa sitoe ka paox tix,

baox thien thie riang rao an kix awx. Son sang pon pa joh jhan teem: coi son kaing jhaw krax ot grawng koe bun mai: kawn iak bre tix yuh mai: krai lao ka awx.

Baux 5. Kaing kaux cong plak ih rhawm rhi, khraixkhrawm can ceu bun daux pui ku ceu daux Meung vax khawm uik, kieh koe riang rao awx. Cub caw bun pa koe daux meung Man ku praix ku klawng, mai: cub caw bun pa dex dawd mai: dee ot dee koe ex, si toe mai kix, yuh krax muih rhawm, kieh koe riang, kieh haok huan awx. Phan yuh- yuh nin, krax jhak kia, krax teem: coi mai: krax tawng rhawm rhi ka heue. Ka daux meung, krax yien yawg mai: krax ih can ceu kawn pui haktiex rhawm paox tix caw tix pau rien ka awx.

LAWG (2)

Baux 6. Cub caw bun kieh nie, caw tix yip shiao been pa sidu awm paox tix heue. Cub caw bun khawm uik daux MeungVax, daux Sien, theux chi, daux chi, can cao kaing: bun glawk mawx glawk an, caw tix mawh pui pa hoik laug daux bang kum: tang to bun daux MeungVaxkhawm uik, phan caw tix koe kaing: pa sideeg cao kaing: dah dee(tang voe) chix tix sau cao kaing: heue

Baux 7. Daux Meung Vax khawm uik, dauxkaung(Sien) veng haktiex blon ting(theux chi) pon tix tang laugkawmiti (voe yien)daux bang kum: yuh cub pui pa tang to bunheue.

Baux 8. Can cub caw bun daux kaung (sien)daux veng haktiex blonting(theux chi)daux veng haktiex (chi), Eeng(sing) glawk mawx glawk an, caw tix yuh kaing greem: pa giex kuang kawmiti(voe yien) daux haktiex vax heue. Caw tix nghaox lao kaing pa yuh tix, koe kaing ceu pa dix? Chawx mhaing ka plak piang tix si jheeng awx.

LAWG (3)

CUB CAW PA JHAWP KAING:, KAING CUB CAW BUN MEUNG VAX

Baux 9. Bang kum: pui tang to bun daux Meung Vax khawm uik khawm leeing kie nie, mawh pa nie ting lhaong ka daux kaing son cub caw bun heue.

Phan mawh Akhuang siawp sibrawm bang kum: pui tang to kaux bun kie nie-

1. Jhi, thong, ka kaing pa yuh bun khawm uik daux Meung Vax, kum: khrawm ka beeh glawm, tat lox sikah.
2. Kaing pa yuh, lai pa krai kaing pa yuh cub caw kawmiti (voe yien)ka daux Meung Vax khawm uik, pon tix ced pon tix chawx, pon tix tawx akhuang.
3. Pon tix cox been giex kuang cub caw bun.
4. Pon tix laug kawmiti(voe yien) daux cub caw bun Meung vax.

Baux 10- 5 num tix bawg yuh bang kum: cub caw kawmiti bun(voeyien) daux Meung Vax heue. Phan koe pa tang

ceu, cub caw kawmiti(voe yien) daux meung pon tix kum: kawmiti tat lox sikah heue. Loh bawg yam hu sivo, phan ang mawh nan deeh krox jun mai: yuh bang kum: ka chix heue.

Baux 11- Bang kum: pui tang to bun daux meung vax khawm uik, khaix hoik laug pa laig daux kawmiti(voe yien)30-35 kaux mawh Yuh cub caw kawmiti(voe yien) bun daux meung khawm uik heue. Phan hoik laug daux kawmiti (voe yien)okkathax(cusi)(1)kaux, nam bad (2)okkathax tiblah, kawmiti jheeng jheeng(chang voe)9-13 kaux. deuh cub chang voe, vee yien, khaix hoik laug tix heue. Phan mawh chang voe voe yien kie nie, kix mawh pa bung: kaing daux bawg yam laux ka bang kum: cub cao tang to bun daux Meung Vax heue. Kix mawh cao thong kaing cub caw bun ku singaix heue. Voe yien daux cub caw bun pon tix yuh mee (5)num heue. Phan hoek bawg yam loh kie nie pon-sau nayaka heue.

Baux 12- Bawg yam laux bang kum: cub pui tang to bun, cub voe yien caw tix yuh kaux to lox tat daux bang: kum: lih koe ceu heue. Kix pon tix tat lox yam koe kaing sug sag daux cub bun, pon tix tawx beeh glawm: voe yien ka daux cub caw bun pui pa caw tix laug tee beeh glawm: krax keud krax sawn, kaing pa yuh, beeh glawm jhawm jheet nawh, griang kaing pa yuh nawh, jhak ka ceu an khan kix kieh lih khaing kaing pa yuh, mai: baox ghaok kaing pa yuh pon tix yuh, yuh nan heue.

Baux 13- Phan mawh bang kum: yuh bun pa laig cub(voe yien) ku num,(1) num tix bawg pon tix yuh heue. Caw tix mawh Voe yien pa khrieh rien heue. Phan mawh

chang voe voe yien yuh bang kum:(3)khix(1) bawg awm pa hoik ah hoik krai, phan mawh cub voe yien cub caw bun caw tix hu laig sinax bun, sawg tix nghiet krax ot grawng koe: bun khan kix heue. Paw kieh dud sinax krax ot grawng koe bun, koe veung thix caw tix krai lao ka chang voe, voe yien awx. Caw tix yuh kaing dee mawx son kaing cub caw bun ang ah, sau riang ka beeh glawm tix awx. Si diex gau son bun yuh kaing cub caw si bun.

LAWG (4)

CUB CAW PRAIX DEE OT DEE KOE

Baux 14. Cub caw son kaing bun glawk mawx glawk an awm pa hoik tang guah sinax meu haktiex giex kuang, daux kaung: daux venghaktiex blon ting(theux chi),Eeng hoik tang guah yuh nin heue.

Baux 15. Phan mawh akhuang siawp sibrawm cub caw bun pa Ot daux praix dee ot mawx dee ot an, mawh bang kum: pa yuh pui tang to bun daux praix dee ot dee koe tix heue. Bang kum: ting pui tang to bun glawk mawx glawk an, caw tix yuh (5)num tix bawg heue. Phan kaing koe tix ceu ceu, cub voe yien caw tix tat lox daux bang kum: an heue. Chix yuh voe, phan ang mawh nan chix tix dux khaix heue.

**Akhuang siawp sibrawm bang kum: cub caw pa tang to
bun daux praix dee ot dee koe.**

1. Daux kaung:, daux veng haktiex blon ting(theux chi), daux veng haktiex, kaing cub caw bun caw tix kum: khrawm mai: tat lox sikah awx.
2. Kaing pa yuh voe yien cub caw bun caw tix chawk mhaing mai: cu ka awx.
3. Laug voe yien cub caw kaing son bun.
4. Laug pui laig bang kun: yuh plakpiang tix, awx.

Baux 16 - Bawg yam laux cub pa tang to bun ka bang kum:, cub kawmiti(voe yien) caw tix yuh kaux to lox tat cub caw bun glawk mawx glawk an lih tix koe ceu heue. Paw kieh dud sinax son krai lao grawng kaing ka plak piang tix heue. Caw tix prawng see pa koe daux cub caw bun plak greem: tix awx. Bang kum: chang voe, daux kaung(sien), veng haktiex blon ting(theux chi)daux veng haktiex(chi) caw tix yuh plak num tix bawg heue. Bang kum: chang voe voe yien (3) khix tix bawg caw tix yuh heue.

Baux 17- Cub caw kaing bun daux kaung:, daux veng, haktiex blon ting, daux veng haktiex, pui pa jhawp kaing lum caw tix deuh koe 2-3 kaux heue. Cub chang voe, voe yien caw thong bung: ka pui yuh kaing daux cub caw bun ku singaix heue. Ka dee laug ka pa jhawp lum (pang kung seex cu reung) nam bad (2) pa jhawp lum caw nghiet

rhawm keud ngai: gaig chang voe ka heue. Caw tix krai lao grawng: laug tix ka voe yien pa sidu glawk mai: tix ka plak piang tix kix caw tix chawk ced ka, mai: deuh lai hoik rieb ka awx. Pa mawh cao kaing: bun pa hoik laug ka kie nie, jao kaing tix ceu ceu, guah tix khaing glawm: tix, cub caw voe yien ka piang nawh chix tix tik nawh, chix tix bawx thien thie koe akhuang tix yuh, yuh nin heue. Daux bawgyam an lai tik ka pui mai:lai pa bawx thien ka pui caw tix tawx ka voe yien cub caw bun heue.

LAWG (5)

NUM RIAH CUB CAW AN KHAN KIX.

Baux 18 . Can pa koe daux Meung Vax, nyiiex yaong:, daux plawg daux nyhawm:, dee yuh kaing jhaw, daux nyiiex yuh cag kaing, dee kaong maw(khuang)daux lum pati, daux tab, daux cawng gau lai phan bun pa hoik naog num koe 50 kaux pon tix yuh cub caw kawmiti(voe yien)koe heue.

Baux 19. Can kawmiti(voe yien) khan kix, hawt ka praix ot deekoe pon tix laug cub bun pa hoik hoek ju khan kix heue. Cao kaing lum (1)kaux, nam ra(2)kaux caw tix yuh kaing cub caw bun ku singaix heue. Cao kaing bun voe yien pon tix laug(5) num tix bawg heue. Beeh glawm pui yuh kaing lum, mai: nam bad (2) mai: voe yien beeh glawm bawg yam chix lai: lox tix heue. Pon bawx thien thie tix laug ka chix heue.

Baux 20. Can kawmiti (voe yien)pa mawh num:kaing kie nie, caw tix nghiet ka glawk sidu mai: cu nghiet ka pa thong bung cub caw bun glawk mawx glawk an heue.

Kaing jhaw pa yuh cub caw bun nghaox lao ka mai: pa jhi
daux krax kaing yuh caw tix cu nghiet ka heue.

LAWG (6)

Baux 21. Cao kaing:(kang:pu)daux cub caw bun khan kix,
kaing son bun mai: kawn iak, kieh koe rhawm pa sang yuh,
yuh rhawm pa kraix khrawm, koe rhawm jhawm jheet pa
mhawm, pon yuh pon ah caw tix mawh bun pa yuh nin pa
teei beeh glawm ka heue. Yip shiao ka been pa laug mai:
been ghaok beeh glawm awx. Cao kaing: (kang:pu) pa caw
tix klawm beeh glawm kaing cub caw bun khan kix, glawk
si du pati, daux lum, cub kru naing, sidu akhuang awm
paox tix heue.

Baux 22. Cub caw bun glawk mawx glawk an, baox riang
rao cao kaing: cao tix awx. Plak kaing pheuk sawn sau
riang daux awx. Phan yuh nin kaing haktiex pa yuh cao
kaing: tom koe ka jhoh jhan ka heue. Cub caw bun son
sang pon laig bun tix teei beeh glawm tang ceu caw tix
pon plaik kix laig daux heue. Kaing: ting nie yuh tix pon
plaik cub pui awn ju ka daux pui tang ceu heue. Phan yuh
nin tom pon ghaok cub ceu bun tang ceu laig daux cub
caw ceu bun heue.

Baux 23. Cao kaing: cub caw bun glawk mawx glawk an,
yuh tix dex dawd mai: pui hao pui hun, kieh kix moh meed
ka tix awx. Nghiet ka pa krai lao pui haoh pui hun awx, si
toe paox tix mai: daux lum khan kix, giex kien: mien: sied
yuh kaing kaux cong awx.

LAWG (7)

PA CAI: MAI MAUX KHRI

Baux 24. Mau pa cai: cub caw bun daux kaing yuh tix, kaing: ting mawh asoyax daux haktiex(tifang ceung fux)pa lih heue. Son mau an, caw tix mawh cub caw giex mau pa tang deuh heue.

Baux 25. Can cub caw bun khan kix, hawt ka praix dee ot dee koe, pa coh pa cum ku ceu, yuh laih lai yuh nan, tompon keud son krax ot bun mai: kawn iak khan kix heue. Yuh kaing yuh nin mawh kieh sibun khan kix yaox tix yuh kaing heue. Phan yuh, yuh nin, mawh son yaox cub caw bun tix siao mau yam lai ling ing tiang tix heue.

Baux 26. Son sang pon cub caw bunb pa teem: coi khaing plak praix ka mau khri, kraung khrai:, caw tix krai lao ka heue. Daux pa pon an khan kix bre tix yip siao rauh see awx.

Baux 27. Asoya(ceung fux)daux haktiex glawk mawx glawk an, phan hoik mawh akhuang hoik pon tix cai:, pon tix ciie(lox tiag guang nyiex, haktiex)mai: kaing laih lai pa hoik yuh cub caw bun, been prawng pon tix ot plak an heue. Pui mawx ang pon tix ting ka awx.

LAWG (8)

TANG CEU

Baux 28. Caw tix kham sag se son akhuang ciie bun heue. Caw tix yaog krax ot grawng koe bun heue. Son krax rien sum: kaw: ka Meung Vax, caw tix plih riang rao bun lih daux heue. In mawh nang beeh glawm son kaing krax ot grawng koe kawn pui heue. Cub caw bun kie nie, bre tix jhawp pa laoh pa chix bun tang ceu, sidiex gau, kraix khrawm ka heue.

Baux 29. Phan mawh bun daux pui tang ceu pa ot daux Meung Vax, akhuang kaing hak tiex, akhuang plak leg lai, akhuang plak coh cum, akhuang pon sin ngao, akhuang plak kaux cong, akhuang prawng mawh mex moeng an khan kix, pon akhuang sidu mai: simex heue. Can akhuang in khan kix been prawng pon tix giex jhawp pau rien ka heue.

Baux30. Sawg daux krax son sang pon cub caw bun daux Meung Vax tix sitioe mai: meung pa dex mai: tix, mai: cub caw bun pa koe ka daux Meung Man khawm uik khawm leeing heue. Yuh tix pon pa teem: coi joh jhan cub caw bun pa koe daux Meung Man heue.

Baux 31. Yam hoik kaux cong: kaing ku ceu yuh cum cub caw bun lih koe heue. Cum an khan kie nie, mawh dee bleeh hoik ting lhaong, hoik haok huan, hoik grum rhawm, hoik grum naog son kaing bun heue.